

四庫全書

集部

欽定四庫全書

唐詩鏡卷三十八

明 陸時雍 編

中唐第十

韓愈

字退之南陽人少孤隨兄官嶺表兄卒愈自知刻苦學儒比長通六經百家貞元八年擢進士累調

四門博士遷監察御史上疏論官闈貶陽山令元和初擢知國子博士分司東都改都官員外郎尋復為博士既才高數黜官又下遷乃作進學解以自喻執政竒其材改比部郎中進中書舍人為裴度行軍司馬伐蔡蔡平遷刑部侍郎上疏論佛骨上怒貶潮州刺史量移袁州召拜國子祭酒轉兵部侍郎穆宗時

宣撫鎮州歸奏遷吏部侍郎轉京兆尹兼御史大夫
為李紳劾罷未幾復吏部侍郎長慶四年卒年五十
七贈禮部尚書謚曰
文有集行四十卷

昌黎才氣縱橫光怪百出氣焰咄咄逼人七古縱
橫無所不可五古須法度自閒昌黎七古繼李杜
有餘五古當
韋柳不足

古樂府

退之琴操十首高雅古澹的是
春秋時語西漢人無此語境

琴操十首

按琴操十有二公取其十如下所作是也風
俗通云琴曲曰操言窮阮猶不失其操也

將歸操 孔子之趙聞殺鳴犢作

按歐本云此效蔡邕作十操事迹皆出蔡邕琴操云

狄之水兮其色幽幽

趙殺鳴犢孔子臨河歎而作歌曰狄之水兮風揚波舟楫顛倒更相

加歸來歸來胡為斯乘臨濟故狄也

我將濟兮不得其由涉其淺兮石齧

我足乘其深兮龍入我舟我濟而悔兮將安歸尤歸兮
歸兮無與石鬪兮無應龍求

石齧我足龍入我舟
托意處語何其雅

荷蘭操 孔子傷不逢時作

古琴操云習習谷風以陰以雨之子于歸遠送于野何彼蒼天不得其所逍遙九州無有定處世人聞蔽不知賢者年紀逝邁一身將老

蘭之猗猗揚揚其香不採而佩於蘭何傷今天之旋其曷為然我行四方以日以年霜雪貿貿也不明薺麥之茂

建亥之月陰氣之極薺麥始生

子如不傷我不爾覲

言我如薺麥之茂當雪霜之時不改

其操子如見傷而用我可也子如不傷我無自貶以見子之義

薺麥之茂薺麥之有茂而

能傲霜雪薺麥之固有

君子之傷君子之守

君子居可傷之時不易其守亦猶薺麥之

也

有點色而無溫情
抑何言之蘊蘊

龜山操 孔子以季桓子受齊女樂諫不從

望龜山而作

龜之氛兮不能雲雨龜之枿兮不中梁柱龜之大兮祇
以奄魯知將隳兮哀莫余伍周公有鬼兮嗟余歸輔

鬼或

思作

是當日夢
寐中心事

越裳操 周公作

交趾之南有越裳云古琴操曰於
戲嗟嗟非旦之力乃文王之德

雨之施物以孳我何意於彼為自周之先其艱其勤以
有疆宇私我後人我祖在上四方在下厥臨孔威敢戲

以侮孰荒于門孰治于田四海既均越裳是臣

言豈有
荒于門

而能治于田者乎故必四
海既均而後越裳是臣也

語可勒黼辰 當時周公勅
天明命告戒成王應止如是

拘幽操 文王姜里作

河內蕩陰縣
有姜里城

文王見拘姜里憂愁無聊援琴而鼓之號曰拘幽
操詞曰殷道溷溷浸濁煩兮朱紫相合不別分兮

迷亂聲色信讒言兮
炎炎之虐使我愆兮
幽閉牢竄由其言兮
違我四人憂勤勤兮

目窈窕兮其凝其盲耳肅肅兮聽不聞聲朝不日出兮
夜不見月與星有知無知兮為死為生嗚呼臣罪當誅
今天王聖明

末二語善寫
文王心曲

岐山操 周公為太王作

我家于豳自我先公伊我承序敢有不同今狄之人將
土我疆民為我戰誰使死傷彼岐有岨我往獨處爾莫

余追無思我悲

處民在不要不棄之間視土在
無吝無貪之際宛是當年語致

履霜操 尹吉甫子伯竒無罪為後母譖而

見逐自傷作

吉甫聽後妻逐之伯竒編芟荷而衣採梲花而食
清朝履霜而自傷無罪見逐乃援琴而鼓之詞曰
朝履霜兮採晨寒考不明其心兮信謔言孤思誰
別兮摧肺肝何辜皇天兮遭斯愆痛沒不同兮思
有偏誰流顧
兮知此究

父兮兒寒母兮兒饑兒罪當答逐兒何為兒在中野以

宿以處四無人聲誰與兒語兒寒何衣兒饑何食兒行
于野履霜以足母生衆兒有母憐之獨無母憐兒寧不

悲

視小弁之
慟為深

雉朝飛操 牧犢子七十無妻見雉雙飛感

之而作

齊宣王時牧犢子七十無妻出薪于野見雉雄
相隨意動心恣因援琴而歌以自傷其聲中絕親
武帝宮人有盧女者七歲入漢宮學鼓琴能傳此
曲牧犢子詞曰雉朝飛兮鳴相和雌雄羣遊兮山

阿我獨何命兮未有家時將暮兮
可奈何嗟嗟暮兮可奈何

雉之飛于朝日羣雌孤雄意氣橫出當東而西當啄而
飛隨飛隨啄羣雌粥粥

記曰粥粥若無能或謂當作州音祝說文呼雞

嗟我雖

人曾不如彼雉雞生身七十年無一妾與妃

是老妝
樸藪語

別鵠操 商陵穆子娶妻五年無子父母欲

其改娶其妻聞之中夜悲嘯穆子感之而

作

其詞曰將乖比翼隔天端山川悠遠路漫漫
漫漫攬衾不寐食忘殮後遂為夫婦

雄鵠銜枝來雌鵠啄泥歸巢成不生子大義當乖離江
漢水之大鵠身鳥之微更無相逢日且可繞樹相隨飛

中豈無情不至作涕泣
流連者迫于大義故也

殘形操 曾子夢見一狸不見其首作

有獸維狸兮我夢得之其身孔明兮而頭不知吉凶何
為兮覺坐而思巫咸上天兮識者其誰

穆穆落落
落故佳

四言古詩

剝啄行

剝剝啄啄有客至門
我不出應客去而嗔
從者語我子明為然
我不厭客困於語言
欲不出納以堙其源
空堂幽幽有稊有莞
門以兩板叢書於間
窅窅深塹其墉甚完
彼寧可隳此不可干
從者語我嗟子誠難
子雖云爾其口益蕃
我為子謀有萬其全
凡今之人急名與官
子不引去與為波瀾
雖不開口雖不開關
變化咀嚼有鬼

有神今去不勇其如後艱我謝再拜汝無復云往追不
及來不有年

跌蕩恣肆仍
如五言體裁

五言古詩

南山詩

吾聞京城南茲維羣山固東西兩際海巨細難悉究山
經及地志茫昧非受授團辭試提挈挂一念萬漏欲休
諒不能麤叙所經覲嘗昇崇丘望戢戢見相湊晴明出

稜角縷脉碎分繡蒸嵐相瀕洞表裏忽通透無風自飄
簸融液煦柔茂橫雲時平凝點點露數岫天空浮脩眉
濃綠畫新就孤撐有巉絕海浴褰鵬噉春陽潛沮洳濯
濯吐深秀巖巒雖嶄萃輒弱類含耐夏炎百木盛蔭鬱
增埋覆神靈日歔歔雲氣爭結構秋霜喜刻轢磔卓立
癯瘦參差相疊重剛耿陵宇宙冬行雖幽墨水雪工琢
鏤新曦照危峨億丈恒高哀明昏無停態頃刻異狀候
西望雄太白突起莫間遙藩都配德運分宅占丁戌逍

遙越坤位詆訐陷乾竇空虛寒兢兢風氣較搜漱朱維
方燒日陰霰縱騰糝昆明大池北去覲偶晴晝縣聯窮
俯視倒側困清漚微瀾動水面踊躍躁猱驚呼惜破
碎仰喜呀不仆前尋徑杜墅空蔽畢原陋崎嶇上軒昂
始得觀覽富行行將遂窮嶺陸煩互走勃然思圻裂擁
掩難恕宥巨靈與夸城遠賈期必售還疑造物意固護
蓄精祐力雖能排幹雷電怯呵詬攀援脫手足蹭蹬抵
積蹙茫如試矯首塙塞生恟慙威容喪蕭爽近新迷遠

舊拍官計日月欲進不可又因緣窺其湫凝湛悶陰罌
魚蝦可俯掇神物安敢寇林柯有脫葉欲墮鳥驚救爭
銜彎環飛投棄急哺噉旋歸道迴睨達枿壯復奏吁嗟
信竒怪峙質能化質前年遭譴謫探歷得邂逅初從藍
田入顧盼勞頸脰時天晦大雪淚目苦朦瞶峻途拖長
冰直上若懸溜褰衣步推馬顛蹶退且復蒼黃忘遐睎
所矚纔左右杉篁吃蒲蘇杲耀攢介胄專心憶平道脫
險逾避臭昨來逢清霽宿願忻始副崢嶸躋冢頂倏閃

雜鼃鼃前低劃開闊爛漫堆衆皴或連若相從或蹙若
相鬪或妥若弭伏或竦若驚雌或散若瓦解或赴若輻
湊或翩若船遊或決若馬驟或背若相惡或向若相佑
或亂若抽笋或嶮若注灸或錯若繪畫或繚若篆籀或
羅若星離或翁若雲逗或浮若波濤或碎若鋤耨或如
育育倫賭勝勇前購先強勢已出後鈍嗔誼譎或如帝
王尊叢集朝賤幼雖親不褻狎雖遠不悖謬或如臨食
案餽核紛釘餽又如遊九原墳墓包榔柩或累若盆甕

或揭若甌豆或覆若曝鱉或頽若寢獸或蜿若藏龍或
翼若搏鷲或齊若友朋或隨若先後或迸若流落或顧
若宿留或戾若仇讐或密若婚媾或儼若峨冠或翻若
舞袖或屹若戰陣或圍若蒐狩或靡然東注或偃然北
首或如火熇焰或若氣饋餽或行而不輟或遺而不收
或斜而不倚或弛而不彀或赤若禿鬣或燠若柴樵或
如龜拆兆或若卦分繇或前橫若剝或後斷若垢延延
離又屬夬夬叛還遘喁喁魚闐萍落落月經宿閨閨樹

墻垣岷岷架庫廡參參削劍戟煥煥銜瑩瑋敷敷花披
萼闐闐屋摧雷悠悠舒而安兀兀狂以粗超超出猶奔
蠢蠢駭不懋大哉立天地經紀肖營媵厥初孰開張僮
勉誰勸侑創茲朴而巧戮力忍勞疲得非施斧斤無乃
假詛呪鴻荒竟無傳功大莫酬儻嘗聞於祠官芬苾降
歆嗅斐然作歌詩惟用贊報酌

窮搜極想語多生氣炎吏故能絢人耳目而不厭
少陵北征隨情披寫南山詩則着意鋪排矣

秋懷詩

牕前兩好樹衆葉光蕤蕤秋風一披拂策策鳴不已微
燈照空床夜半偏入耳愁憂無端來感嘆成坐起天明
視顏色與故不相似義和驅日月疾急不可恃浮生雖
多塗趨死惟一軌胡為浪自苦得酒且歡喜

五言古每覺
語致崛屈

秋氣日惻惻秋空日凌凌上無枝上蛸下無盤中蠅豈
不感時節耳目去所憎清曉卷書坐南山見高稜其下
澄秋水有蛟寒可罾惜哉不得往豈謂吾無能

氣格
峻增

離離挂空悲感感抱虛警露泣秋樹高蟲弔寒夜永斂
退就新懦趨營悼前猛歸愚識夷塗汲古得修綆名浮
猶有耻味薄真自幸庶幾遺悔尤即此是幽屏

多警
句

今晨不成起端坐盡日景蟲鳴室幽幽月吐牕罔罔喪
懷若迷方浮念劇含梗塵埃慵伺候文字浪馳騁尚須
勉其頑王事有朝請

歸彭城

天下兵又動太平竟何時訐謨者誰子無乃失所宜前
年關中旱閭井多死飢去歲東郡水生民為流屍上天
不虛應禍福各有隨我欲進短策無由見彤墀剝肝以
為紙澀血以書辭上言陳堯舜下言引龍夔言詞多感
激文字少歲疑一讀已自怪再尋良自疑食芹雖云美
獻御固已痴緘封在骨髓耿耿空自竒昨日到京城屢
陪高車馳周行多俊異議論無瑕疵見待頗異禮未能

去毛皮到口不敢吐徐徐俟其熾歸來戎馬間驚顧似
羈雌連日或不語終朝見相欺乘閒輒騎馬茫茫詣空
陂遇酒即酩酊君知我為誰

韓詩語帶
粗類痕

同冠峽

南方二月半春物亦已少維舟山水間晨坐聽百鳥宿
雲尚含姿朝日忽升曉羈旅感和鳴囚拘念輕矯潺湲
波又迸詰曲思增繞行矣且無然蓋棺事乃了

縣齋有懷

少小尚竒偉平生足悲吒猶嫌子夏儒肯學樊遲稼事
業窺臯稷文章蔑曹謝濯纓起江湖綴珮雜蘭麝悠悠
指長道去去策高駕誰為傾國媒自許連城價初隨計
吏貢屢入澤宮射雖免十上勞何能一戰霸人情忌殊
異世路多權詐蹉跎顏遂低摧折氣愈下治長信非罪
侯生或遭罵懷書出皇都銜淚渡清灞身將老寂寞志
欲死閒暇朝食不盈腸冬衣纔掩骼軍書既頒召戎馬

乃連跨大梁從相公彭越赴僕射弓箭園狐兔絛竹羅
酒肉兩府變荒涼三年就休暇求官去東洛犯雪過西
華塵埃紫陌春風雨靈臺夜名聲荷朋友援引乏姻婭
雖陪彤庭臣詎縱青冥鞞寒空聳危闕曉色曜修架捐
軀辰在丁鍛翮時方禘投荒誠職分領邑幸寬赦湖波
翻日車嶺石圻天罅毒霧恒熏晝炎風每燒夏雷威固
已加颺勢仍相借氣象杳難測聲音吁可怕夷言聽未
慣越俗循猶乍指摘兩憎嫌睚眦互猜訝祇緣恩未報

豈謂生足藉嗣皇新繼明率土日流化惟思滌瑕垢長
去事桑柘斲嵩開雲扃壓頰抗風榭禾麥種滿地梨棗
栽繞舍兒童稍長成雀鼠得驅嚇官租日輸納村酒時
邀迂閒愛老農愚歸弄小女姪如今便可爾何用畢婚
嫁

吾愛其便滔滔
而來絕不費手

合江亭

紅亭枕湘江蒸水會其左瞰臨渺空濶綠淨不可唾維

昔經營初邦君實王佐翦林遷神廟買地費家貨梁棟
宏可愛結構麗匪過伊人去軒騰茲宇遂頽挫老郎來
何暮高唱久乃和樹蘭盈九畹栽竹逾萬个長綆汲滄
浪幽谿下坎坳波濤夜俯聽雲樹朝對卧初如遺宦情
終乃最郡課人生誠無幾事往悲豈奈蕭條綿歲時契
濶繼庸懦勝事誰復論醜聲日已播中丞黜凶邪天子
憫窮餓君侯至之初閭里自相賀淹滯樂閒曠勤苦勸
慵惰為余掃塵階命樂醉衆座窮秋感平分新月憐半

破顧書岬上石勿使泥塵浼

音

陪杜侍御遊湘西兩寺獨宿有題因獻楊常侍

長沙千里平勝地猶在險况當江濶處斗起勢匪漸深
林高玲瓏青山上琬琰路窮臺殿闢佛事煥且儼剖竹
走泉源開廊架崖广是時秋之殘暑氣尚未斂羣行忘
後先朋息棄拘檢客堂喜空涼華榻有清簟澗蔬煮蒿
芹水果剥菱芡伊余夙所慕陪賞亦云忝幸逢車馬歸
獨宿門不掩山樓黑無月漁火燦星點夜風一何喧杉

檜屢磨颺猶疑在波濤怵惕夢成魘靜思屈原沉遠憶
賈誼貶椒蘭爭妬忌絳灌共譏諂誰令悲生腸坐使淚
盈臉翻飛乏羽翼指摘因瑕玷珥貂藩維重政化類分
陝禮賢道何優奉已事苦儉大厦棟方隆巨川楫行剡
經營誠未暇遊宴固已歎旅程愧掩留徂歲嗟荏苒平
生每多感柔翰遇頻染輾轉嶺猿鳴曙燈青賸賸

岳陽樓別竇司直

洞庭九州閭厥大誰與讓南匯羣崖水北注何奔放瀟

為七百里吞納各殊狀自古澄不清環混無歸向炎風
日搜攪幽怪多冗長軒然大波起宇宙隘而妨巍峩拔
嵩華騰蹕較健壯聲音一何宏轟輅車萬兩猶疑帝軒
轅張樂就空曠蛟螭露筵簾縞練吹組帳鬼神非人世
節奏頗跌踴陽施見誇麗陰閉感悽愴朝過宜春口極
北缺堤障夜纜巴陵洲叢芮纔可傍星河盡涵泳俯仰
迷下上餘瀾怒不已喧聒鳴甕盎明登岳陽樓輝煥朝
日亮飛廉戢其威清晏息纖纒泓澄湛凝綠物影巧相

汎江豚時出戲驚波忽蕩漾時當冬之孟隙竅縮寒漲
前臨指近岫側坐眇難望滌濯神魂醒幽懷舒以暢主
人孩童舊握手乍忻悵憐我竄逐歸相見得無恙開筵
交履烏爛漫倒家釀杯行無留停高柱送清唱中盤進
橙栗投擲傾脯醬歡窮悲心生婉孌不能忘念昔始讀
書志欲干霸王屠龍破千金為藝亦云亢愛才不擇行
觸事得讒謗前年出官由此禍最無妄公卿採虛名擢
拜識天仗奸猜畏彈射斥逐恣欺誑新恩移府庭逼側

創諸將于嗟苦驚緩但恐失宜當追思南渡時魚腹甘
所葬嚴程迫風帆劈箭入高浪顛沉在須臾忠綆誰復
諒生還真可喜尅已自懲創庶從今日後粗識得與喪
事多改前好趣有獲新尚誓耕十畝田不取萬乘相細
君知蠶織稚子已能餉行當掛其冠生死君一訪

不為雄壯之勢却擁筆自來才大
者覺勢有餘地 意象髣髴略似

出門

長安百萬家出門無所之豈敢尚幽獨與世實參差古

人雖已死書上有其辭開卷讀且想千載若相期出門
各有道我道方未夷且於此中息天命不吾欺

東都遇春

少年氣真狂有意與春競行逢二三月九州花相映川
原曉服鮮桃李晨粧靚荒乘不知疲醉死豈辭病飲噉
惟所便文章倚豪橫爾來曾幾時白髮忽滿鏡舊遊喜
乖張新輩足嘲評音病心腸一變化羞見時節盛得閒無
所作貴欲辭視聽深居疑避仇默卧如當暝朝曦入牖

來鳥喚昏不醒為生鄙計算鹽米告屢罄坐疲都忘起
冠側嬾復正幸蒙東都官獲離機與甯垂慵遭傲僻漸
染生弊性既去焉能追有來猶莫騁有船魏王池往往
縱孤泳水容與天色此處皆綠淨岸樹共紛披渚牙相
綿經音徑懷歸苦不果即事取幽迸貪求匪名利所得亦
已併悠悠度朝昏落落捐季孟羣公一何賢上戴天子
聖謀謨收禹績四面出雄勁轉輸非不勤稽逋有軍令
在庭百執事奉職各祇敬我獨胡為哉坐與憶兆慶譬

如籠中鳥仰給活性命為詩告友生負愧終究竟

送侯參謀赴河中幕

憶昔初第日各以少年稱君願始生鬚我齒清如冰爾
時心氣壯百事謂已能一別詎幾何忽如隔晨興我齒
豁可鄙君顏老可憎相逢風塵中相視迭嗟矜幸同學
省官末路再得朋東司絕教授遊宴以為恒秋漁蔭密
樹夜博燠明燈雪逕抵樵叟風廊折談僧陸渾桃花間
有湯沸如蒸三月崧少步躑躅紅千層洲沙厭晚坐嶺

壁窮晨昇沈寘不計日為樂不可勝遷滿一已異乖離
坐難憑行行事結束人馬何踰騰感激生膽勇從軍豈
嘗曾沈沈司徒公天子爪與肱提師十萬餘四海欽風稜
河北兵未進蔡州師新薨曷不請掃除活彼黎與烝鄙
夫誠怯弱受恩愧徒弘猶思脫儒冠棄死取先登又欲
面言事上書求詔徵侵官固非是妄作譴可懲惟當待
責免耕斲歸溝塍今君得所附勢若脫鞬鷹檄筆無與
讓幕謀職其膺收績開史牒翰飛逐溟鵬男兒貴立事

流景不可乘，歲老陰沴作。雲頽雪翻崩，別袖拂洛水。征
車轉峻陵，勤勤酒不進。勉勉恨已仍，送君出門歸。愁腸
若牽繩，默坐念語笑。癡如遇寒蠅，策馬誰可適。晤言誰
為應，席塵惜不掃。殘樽對空凝，信知後會時。日月屢環
絙，生期理行役，歡緒絕難承。寄書惟在頻，無恡簡與繒。

韓之五言當敏宏節放激萍
揚波凡任才者未有不病

送李翺

廣州萬里途，山重江逶迤。行行何時到，誰能定歸期。揖

我出門去顏色異恒時雖云有追送足跡絕自茲人生
一世間不自張與弛譬如浮江水縱橫豈自知寧懷別
時苦勿作別後思

自足繼絕末二
語大有深情

送石處士赴河陽幕

長把種樹書人云避世士忽騎將軍馬自號報恩子風
雲入壯懷泉石別幽耳鉅鹿師欲老常山險猶恃豈惟
彼相憂固是吾徒耻去去事方急酒行可以起

磊磊
落落

送湖南李正字歸

長沙入楚深，洞庭值秋晚。
人隨鴻雁少，江共蒹葭遠。
歷歷歷余所經，悠悠子當返。
孤遊懷耿介，旅宿夢婉婉。
風土稍殊音，魚蝦日異飯。
親交俱在此，誰與同息偃。

語稍修秀
起四語灑落
一

送無本師歸范陽

無本於為文，身大不及膽。
吾嘗示之難，勇往無不敢。
蛟

龍弄角牙造次欲手攬衆鬼囚大幽下覩襲玄窗天陽
熙四海注視首不領鯨鵬相摩宰兩舉快一噉夫豈能
必然固已謝黯黯狂詞肆滂葩低昂見舒慘姦窮怪變
得徃徃造平澹蜂蟬碎錦纈綠池披茵茵芝英擢荒榛
孤翮起連茭家住幽都遠未識氣先感來尋吾何能無
殊嗜昌歆始見洛陽春桃枝綴紅糝遂來長安里時卦
轉習坎老懶無鬪心久不事鉛槧欲以金帛酬舉室常
頗領念當委我去霜雪刻以惜惇飈攪空衢天地與頓

撼勉率吐歌詩慰女別後覽

微奇得怪
往往有之

人日城南登高

初正候纔兆涉七氣已弄霏霏野浮陽暉暉水披凍聖
朝身不廢佳節古所用親友既許來子姪亦可從盤蔬
冬春雜樽酒清濁共令徵前事為觴詠新詩送扶杖凌
圯陟刺船犯枯葑戀池羣鴨迴釋嶠孤雲縱人生本坦
蕩誰使妄倥偬直指桃李闌幽尋寧止重

古而
帶秀

病鷓

屋東惡水溝有鷓墮鳴悲青泥揜兩翅拍拍不得離羣
童叫相台瓦礫爭先之計較生平事殺却理亦宜攘奪
不愧恥飽滿盤天嬉晴日占光景高風送追隨遂凌鳳
鳳羣肯顧鴻鵠卑今者運命窮遭逢巧丸兒中汝要害
處汝能不得施于吾乃何有不忍棄其危丐汝將死命
浴以清水池朝餐輟魚肉暝宿防狐狸自知無以致蒙

德久猶疑飽入深竹叢
饑來傍階基亮無青報
心固以聽所為昨日有
氣力飛跳弄藩籬今晨
忽徑去曾不報我知僥
倖非汝福天衢汝休窺
京城事彈射豎子豈易
欺勿諱泥坑辱泥坑乃
良規

路傍堠

堆堆路傍堠一雙復一隻
迎我出秦關送我入楚澤
千以高山遮萬以遠水隔
吾君勤聽治照與日月敵
在愚幸可哀臣罪庶可釋
何當迎送歸緣路高歷歷

贈別元十八協律

知識久去眼吾行其既遠
曹曹莫嘗省默默但寢飯
子兮何為者冠珮立憲憲
何氏之從學蘭蕙已滿晚
於何翫其光以至歲向晚
治惟尚和同無俟于蹇蹇
或師絕學賢不以藝自軌
子兮獨如何能自媚婉婉
金石出聲音宮室發闕楫
何人識章甫而知駿蹄踠
惜乎吾無居不得留息偃
臨當背而時裁詩示繾綣

宿曾江口示姪孫湘

雲昏水奔流，天水滯相圓。
三江滅無口，其誰識涯圻。
暮宿投民村，高處水半扉。
雞犬俱上屋，不復走與飛。
篙舟入其家，暝聞屋中啼。
問知歲常然，哀此為生微。
海風吹寒晴，波揚衆星輝。
仰視北斗高，不知路所歸。

寫景處喜其徑淨
末數語歷落成響

除官赴闕至江州寄鄂岳李大夫

盆城去鄂渚，風便一日耳。
不枉故人書，無因泛江水。
故人故辭禮，闈旌節鎮江圻。
而我竄逐者，龍鍾初得歸。
別來

已三歲望望遠迢遞咫尺不相聞平生那可計我齒落
且盡君鬢白幾何年皆過半百來日苦無多少年樂新
知衰暮思故友譬如親骨肉寧免相可不我昔實愚蠢
不能降色辭子犯亦有言臣猶自知之公其務賞過我
亦請改事桑榆儻可收願寄相思字

懇款
殆盡

譴瘡鬼

屑屑水帝魂謝謝無餘輝如何不肖子尚奮瘡鬼威乘

秋作寒熱翁嫗所罵譏求食歐泄間不知臭穢非醫師
加百毒熏灌無停機灸師施艾炷酷若獵火圖詛師毒
口牙舌作霹靂飛符師弄刀筆丹墨交橫揮咨汝之胄
出門戶何巍巍祖軒而父頊未沫於前徽不修其操行
賤薄似汝稀豈不忝厥祖醜然不知歸湛湛江水清歸
居安汝妃清波為裳衣白石為門畿呼吸明月光手掉
芙蓉旂降集隨九歌飲芳而食菲贈汝以好辭出汝去

莫遠

退之不作滑稽
語自快所欲為

示兒

始我來京師止携一束書辛勤三十年以有此屋廬此
屋豈為華於我自有餘中堂高且新四時登牢蔬前榮
饌賓親冠昏之所於庭內無所有高樹八九株有藤蔓
絡之春華夏陰敷東堂坐見山雲風相吹噓松果連南
亭外有瓜芋區西偏屋不多槐榆翳空虚山鳥旦夕鳴
有類澗谷居主婦坐北堂膳服適戚疎恩封高平君子

孫從朝裾開門問誰來無非卿大夫不知官高卑玉帶
懸金魚問客之所為我冠講唐虞酒食罷無為棋槩以
相娛凡此座中人十九持鈞樞又問誰與頻莫與張樊
如來過亦無事考評道精麤蹉蹉媚學子牆屏日有徒
以能問不能其蔽豈可祛嗟我不修飾事與庸人俱安
能坐如此比肩於朝儒詩以示兒曹其無迷厥初

大有
漢氣

南溪始泛

榜

音誘

舟南山下上上不得返幽事隨去多孰能量近遠

陰沉過連樹藏昂抵橫坂石麓肆磨礪波惡厭牽挽或
倚偏岬漁竟就平洲飯點點暮雨飄梢梢新月偃餘年
慄無幾休日愴已晚自是病使然非由取高蹇

語致
洒洒

足弱不能步自宜收朝蹟羸形可與致佳觀

去聲

安可擲

即此南坂下久聞有水石拖舟入其間溪流正清澈隨
波吾未能峻瀨乍可刺鷺起若導吾前飛數十尺亭亭

柳帶沙團團松冠壁歸時還盡夜誰謂非事役

唐詩鏡卷三十八

欽定四庫全書

唐詩鏡卷三十九

明 陸時雍 撰

中唐第十一

韓愈 二

七言古詩

馬厭穀

馬厭穀兮士不厭糠
糝土被文繡兮士無
裋褐彼其得

志兮不我虞一朝失志兮其何如已焉哉嗟嗟乎鄙夫

古韻氣

嗟哉董生行

淮水出桐栢山東馳遙遙千里不能休淝水出其側不
能千里百里入淮流壽州屬縣有安豐唐貞元時縣人
董生召南隱居行義於其中刺史不能薦天子不聞名
聲爵祿不及門門外惟有吏日來徵租更索錢嗟哉董
生朝出至夜歸讀古人書盡日不得息或山而樵或水

而漁入廚具甘旨上堂問起居父母不感感妻子不咨
咨嗟哉董生孝且慈人不識惟有天翁知生祥下瑞無
時期家有狗乳出求食鷄來哺其兒喙喙庭中拾蟲蟻
哺之不食鳴聲悲徬徨躑躅久不去以翼來覆待狗歸
嗟哉董生誰將與儔時之人夫妻相虐兄弟為讐食君
之祿而令父母愁亦獨何心嗟哉董生無與儔

大是摸
漢得來

利劍

利劍光耿耿佩之使我無邪心故人念我寡徒侶持用
贈我比知音我心如冰劍如雪不能刺讒夫使我心腐
劍鋒折決雲中斷開青天噫劍與我俱變化歸黃泉

短折
而銛

汴州亂二首

汴州城門朝不開天狗墮地聲如雷健兒爭誇殺留後
連屋累棟燒成灰諸侯咫尺不能救孤主何者自興衰
母從子走者為誰大夫夫人留後免昨日乘車騎大馬

坐者起趨乘者下廟堂不肯用干戈嗚呼奈汝母子何

語致
自放

河之水二首寄子姪老成

河之水去悠悠我不如水東流我有孤姪在海陬三年
不見兮使我生憂日復日夜復夜三年不見汝使我鬢
髮未老而先化

河之水悠悠去我不如水東注我有孤姪在海浦三年
不見兮使我心苦采葦於山緡魚於淵我徂京師不遠

其還

古韵

山石

山石聲确

音覺

行徑微黃昏到寺蝙蝠飛昇堂坐階新雨

足芭蕉葉大支子肥僧言古壁佛畫好以火來照所見

稀鋪牀拂席置羹飯踈糲

音臘

亦足飽我饑夜深靜臥百

蟲絕清月出嶺光入扉天明獨去無道路出入高下窮

烟霏山紅澗碧紛爛漫時見松樵皆十圍當流赤足蹋

澗石水聲激激風吹衣人生如此自可樂豈必局束為人
鞿音嗟哉吾黨二三子安得至老不更歸

語如清流齧石激激相注
杜虛境過形昌黎當境實寫 李

鳴鴈

嗷嗷鳴鴈鳴且飛窮秋南去春北歸去寒就暖識所依
天長地濶棲息稀風霜酸苦稻梁微毛羽摧落身不肥
徘徊反顧羣侶違哀鳴欲下洲渚飛江南水濶朝雲多
草長沙軟無網羅閒飛靜集鳴相和違憂懷惠性匪他

凌風一舉君謂何

較青蓮輸

張語俊

贈鄭兵曹

罇酒相逢十載前君為壯夫我少年罇酒相逢十載後
我為壯夫君白首我材與世不相當戢鱗委翅無復望
當今賢俊皆周行君何為乎亦遑遑杯行到君莫停手
破除萬事無過酒

贈唐衢

虎有爪兮牛有角，虎可搏兮牛可觸。奈何君獨抱竒材，
手把犁鋤餓空谷。當今天子急賢良，匭函朝出開明光。
胡不上書自薦達，坐令四海如虞唐。

贈侯喜

吾黨侯生字叔起，呼我持竿釣溫水。水平明，鞭馬出都門。
盡日行行荆棘裏，溫水微茫絕又流。深如車轍濶容輻，
蝦蟆跳過雀兒浴。此縱有魚何足求，我為侯生不能已。
盤針擘粒投泥滓，曄時堅坐到黃昏。手倦目勞方一起。

暫動還休未可期
蝦行蛭渡似皆疑
舉竿引線忽有得
一寸纔分鱗與鬚
是日侯生與韓子
良久歎息相看悲
我今行事盡如此
此事正好為吾規
半世遑遑就舉選
一名始得紅顏衰
人間事勢豈不見
徒自辛苦終何為
便當提携妻與子
南入箕潁無還時
叔起君今氣方銳
我言至切君勿嗤
君欲釣魚須遠去
大魚豈肯居沮洳

尋常語自個儻退之七古佳處在
聲氣之間如疾雨驚雷砮陵而下

八月十五夜贈張功曹

織雲四卷天無河清風吹空月舒波沙平水息聲影絕

一杯相屬

音行

君當歌君歌聲酸辭且苦不能聽終淚如

雨洞庭連天九疑高蛟龍出沒猩鼯號十生九死到官
所幽居默然如箴逃下牀畏蛇食畏藥海氣濕蟄熏腥
臊昨者州前槌大鼓嗣皇繼聖登夔臯赦書一日行萬
里罪從大辟皆除死遷者追迴流者還滌瑕蕩垢朝清
班州家申名使家抑坎軻祇得移荆蠻判司卑官不堪
說未免捶楚塵埃間同時輩流多上道天路幽險難追

攀君歌且休聽我歌我歌今與君殊科一年明月今宵
多人生由命非由他有酒不飲奈明何

每讀昌黎七言古詩
覺有飛舞翔翥之勢

謁衡岳廟遂宿岳寺題門樓

五嶽祭秩皆三公四方環鎮嵩當中火維地荒足妖怪
天假神柄專其雄噴雲泄霧歲半腹雖有絕頂誰能窮
我來正逢秋雨節陰氣晦昧無清風潛心默禱若有應
豈非正直能感通須臾掃盡衆峰出仰見突兀撐青空

紫葢連延接天柱石廩騰擲堆祝融森然魄動下馬拜
松栢一逕趨靈官粉牆丹桂動光彩鬼物圖畫填青紅
升階偃僂薦薦脯酒欲以菲薄明其衷廟令老人識神意
睢盱偵且鄭切伺能鞠躬手持杯玆導我擲云此最吉餘
難同竄逐蠻荒幸不死衣食纔足甘長終侯王將相望
久絕神縱欲福難為功夜投佛寺上高閣星月揜映雲
腫朧猿鳴鐘動不知曙杲杲寒日出於東

語如
鑿翠

岫嶽山

岫嶽山尖神禹碑字青石赤形樸竒科斗拳身薤倒披
鸞飄鳳泊挐虎螭事巖跡秘鬼莫窺道人獨上偶見之
我來咨嗟涕漉漉千搜萬索何處有森森綠樹猿猱悲

永貞行

君不見太皇諒陰未出令小人乘時偷國柄北軍百萬
虎與貔天子自將非他師一朝奪印付私黨慄慄朝士
何能為狐鳴梟噪爭署置賜賂跳踉相媼媚夜作詔書

朝拜官超資越序曾無難公然白日受賄賂火齋磊落
堆金盤元臣故老不敢語晝臥涕泣何汎瀾董賢三公
誰復惜侯景九錫行可歎國家功高德且厚天位未許
庸夫干嗣皇卓犖信英主文如太宗武高祖膺圖受禪
登明堂共流幽州絲死羽四門肅穆賢俊登數君匪親
豈其朋郎官清要為世稱荒郡迫野嗟可矜湖波連天
日相騰蠻俗生梗瘴癘蒸江氛嶺稜音沒昏若凝一蛇兩
頭見未曾怪鳥鳴喚令人憎蠱蟲羣飛夜撲燈雄虺毒

螫音釋墮股肱食中置藥肝心崩左右使令詐難憑慎勿
浪信常兢兢吾聞同僚情可勝具書目見非妄徵嗟爾
既往宜為懲

李花贈張十一署

江陵城西二月尾花不見桃惟見李風揉雨練雪羞比
波濤翻空杳無涖君知此處花何似白花倒燭天夜明
羣鷄驚鳴官吏起金烏海底初飛來朱輝散射青霞開
迷魂亂眼看不得照耀萬樹繁如堆念昔少年著遊燕

對花豈省曾辭杯自從流落憂感集欲去未到先思迴
祇今四十已如此後日更老誰論哉力携一尊獨就醉
不忍虛擲委黃埃

杏花

居鄰北郭古寺空杏花兩株能白紅曲江滿園不可到
看此寧避雨與風二年流竄出嶺外所見草木多異同
冬寒不嚴地恒泄陽氣發亂無全功浮花浪藥鎮長有
纔開旋落瘴霧中山榴躑躅少意思照耀黃紫徒為叢

鷓鴣鉤輶猿叫歇
杳杳深谷攢青楓
豈如此樹一來翫
若在京國情何窮
今旦胡為忽惆悵
萬心飄泊隨西東
明年更發應更好
道人莫忘鄰家翁

感春

皇天平分成四時
春氣漫誕最可悲
襟花粧林草葢地
白日坐上傾天維
蜂喧鳥咽留不得
紅萼萬片從風吹
豈如秋霜雖慘冽
摧落老物誰惜之
為此徑須沽酒飲
自外天地棄不疑
近鄰老杜無檢束
爛熳長醉無文辭

屈原離騷二十五不肯舖吸糟與醅惜哉此子巧言語
不到聖處寧非癡幸逢堯舜明四目條理品彙皆得宜
平明出門暮歸舍酌酤馬上知為誰

憶昨行和張十一

憶昨夾鐘之呂初吹灰上公禮罷元侯迴車載牲牢甕
舁酒並召賓客延鄒枚腰金首翠光照耀絲竹迴發清
以哀青天白日花草麗玉笋屢舉傾金壘張君名聲座
所屬起舞先醉長松摧宿醒未解舊疾作深室靜卧聞

風雷自期殞命在春序屈指數日憐嬰孩危辭苦語感
我耳淚落不掩何淮淮念昔從君渡湘水大帆夜劃窮
高梔陽山鳥路出臨武驛馬拒地驅頻墮踐蛇茹盞不
擇死忽有飛詔從天來休文未揃崖州熾雖得赦宥恒
愁猜近者三奸恚破碎羽窟無底幽黃能眼中了了見
鄉國知有歸日眉方開今君縱署天涯吏投檄此去何
難哉無妄之憂勿藥喜一善自足禳千災頭清目朗肌
骨健古劍新磨塵埃歿銷禍散百福併從此直至耆

與鮎蒿山東頭伊洛岸勝事不假須穿裁君當先行我
待滿沮溺可繼窮年推

劉生詩

生名師命其姓劉自少軒昂非常儔棄家如遺來遠遊
東走梁宋暨揚州遂凌大江極東陬洪濤春天禹穴幽
越女一笑三年留南逾橫嶺入炎州青鯨高磨波山浮
怪魅炫曜堆蛟虬山獾音騷謹譟猩猩游毒氣爍體黃膏
流問胡不歸良有由美酒傾水角肥牛妖歌慢舞慢不

收倒心迴腸為青眸千金邀顧不可酬乃獨遇之盡綢繆瞥然一餉成十秋昔鬚未生今白頭五管歷徧無賢侯迴望萬里還家羞陽山窮邑惟猿猴手持釣竿遠相投我為羅列陳前修芟蒿斬蓬利鋤耨天星迴環數纜周文學穰穰困倉稠車輕御良馬力優吐哉識路行勿休往取將相酬恩讐

來如
倒峽

鄭羣贈簞

蘄州笛竹天下知鄭君所寶尤瓌竒
攜來當畫不得臥
一府傳者黃琉璃體堅色淨又藏節盡
眼凝滑無瑕疵
法曹貧賤衆所易腰腹空大何能為
自從五月困暑濕
如坐深甑遭蒸炊手磨袖拂心語口
慢膚多汗真相宜
日暮歸來獨惆悵有賣直欲傾家資
誰謂故人知我意
卷送八尺含風漪呼奴掃地鋪未了
光彩照耀驚童兒
青蠅側翅蚤蟲避蕭蕭疑有清飈吹
倒身甘寢百疾愈
却願天日恒炎曦明珠清玉不足報
贈子相好無時衰

豐陵行

羽衛煌煌一百里曉出都門葬天子羣臣雜沓馳後先
宮官穰穰來不已是時新秋七月初金神按節炎氣除
清風飄飄輕雨灑偃蹇旂旆卷以舒逾梁下坂笳鼓咽
嵒岨遂走玄宮閤哭聲訇天百鳥噪幽坎晝閉空靈輿
皇帝孝心深且遠資送禮備無贏餘設官置衛鎖嬪妓
供養朝夕象平居臣聞神道尚清淨三代舊制存諸書
墓藏廟祭不可亂欲言非職知何如

送區弘南歸

穆昔南征軍不歸
蟲沙援鶴伏以飛
洶洶洞庭蒼翠微
九疑鏡天荒是非
野有象犀水貝璣
分散百寶人士稀
我遷於南日周圍
來見者衆莫依稀
爰有區子熒熒暉
觀以藝訓或從違
我念前人譬葑菲
落以斧引以纏微
雖有不逮驅駢駢
或採于薄漁于磯
服役不辱言不譏
從我荊州來京畿
離其母妻絕因依
嗟我道不能自肥
子雖勤苦終何希
王都觀闕雙巍巍
騰踏衆駭事鞍鞿

佩服上色紫與緋獨子之節可嗟啼母附書至妻寄衣
開書折衣淚痕晞雖不勒還情庶幾朝暮盤羞惻庭闈
幽房無人感伊威人生此難餘可祈子去矣時苦發機
蜃沉海底氣昇霏彩雉野伏朝扇翬處子窈窕王所妃
苟有令德隱不腓況今天子鋪德威蔽能者誅薦受機
出送撫背我涕揮行行正直慎脂韋業成志樹來頽頽
我當為子言天扉

多古
句

三星行

我生之辰月宿南斗牛奮其角箕張其口牛不見服箱
斗不挹酒漿箕獨有神靈無時停簸揚無善名已聞無
惡聲已謹名聲相乘除得失少有餘三星各在天什五
東西陳嗟汝牛與斗汝獨不能神

醉留東野

昔年因讀李白杜甫詩長恨二人不相從吾與東野生
並世如何復躡二子蹤東野不得官白首誇龍鐘韓子

稍姦黠自慚青蒿倚長松
低頭拜東野願得終始如
駟蛩東野不迴顧有如寸筵
撞鉅鐘我願身為雲東野
變為龍
四方上下逐東野雖有離
別無由逢

淋漓
酣暢

酬司門盧四兄雲夫院長望秋竹

長安雨洗新秋出極目寒鏡開塵函
終南曉望蹋龍尾倚天更覺青巉巉
自知短淺無所補從事久此穿朝衫
歸來得便即遊覽
暫似壯馬脫重銜
曲江荷花蓋十里

江湖生自思莫緘樂遊下矚無遠近綠槐萍合不可芟
白首寓居誰借問平地寸步局雲巖雲夫吾兄有狂氣
嗜好與俗殊酸鹹日來省我不肯去論詩說賦相誦誦
望秋一章已驚絕猶言低抑避謗讒若使乘酣駢雄怪
造化何以當鐫剗嗟我小生值強伴怯膽變勇神明鑿
馳坑跨谷終未悔為利而止真貪饒高揖羣公謝名譽
遠追甫白感至誠樓頭完月不共宿其奈就缺行撼撼

峭倚
天壁

石鼓歌

張生手持石鼓文，勸我試作石鼓歌。少陵無人謫仙死，
才薄將奈石鼓何。周網陵遲四海沸，宣王憤起揮天戈。
大開明堂受朝賀，諸侯劔佩鳴相磨。蒐于岐陽騁雄俊，
萬里禽獸皆遮羅。鑄功勒成告萬世，鑿石作鼓隳嵯峨。
從臣才藝咸第一，揀選撰刻留山河。雨淋石炙野火燎，
鬼物守護煩撓訶。公從何處得紙本，毫髮盡備無差訛。
辭嚴義密讀難曉，字體不類隸與科。年深豈免有缺畫，

快劍斫斷生蛟鬣，鸞翔鳳翥衆仙下。珊瑚碧樹交枝柯，
金繩鐵索鎖鈕壯。古鼎躍水龍騰梭，陋儒編詩不收入。
二雅徧迫無委蛇，孔子西行不到秦。倚檝星宿遺羲娥，
嗟予好古生苦晚。對此涕淚雙滂沱，憶昔初蒙博士徵。
其年始改稱元和，故人從軍在右輔。為我量度掘臼科，
濯冠沐浴告祭酒。如此至寶存，豈多氈包席褱可立致。
十鼓祇載數駱駝，薦諸太廟比郟鼎。光價豈止百倍過，
聖恩若許留太學。諸生講解得切磋，觀經鴻都尚填咽。

坐見舉國來奔波剌苔剔蘚露節角安置妥帖平不頗
大厦深簷與蓋覆經歷久遠期無他中朝大官老於事
詎肯感激徒媵媵牧童敲火牛礪角誰復著手為摩挲
日消月鑠就埋沒六年西顧空吟哦羲之俗書趁姿媚
數紙尚可博白鸞繼周八代爭戰罷無人收拾理則那
方今太平日無事柄任儒術崇邱軻安能以此尚論列
願借辯口如懸河石鼓之歌止於此嗚呼吾意其蹉跎

聽潁師彈琴

昵昵兒女語恩怨相爾汝劃然變軒昂勇士赴敵場浮
雲柳絮無根蒂天地濶遠隨飛揚喧啾百鳥羣忽見孤
鳳凰躋攀分寸不可上失勢一落千丈強嗟余有兩耳
未省聽絲篁自聞潁師彈起坐在一旁推手遽止之濕
衣淚滂滂潁乎爾誠能無以冰炭置我腸

倔强低昂彷彿畧盡然此非高山流水之音也將令陽春白雪俱作楚宮別調耳

盧郎中雲夫寄示送盤谷子詩兩章歌以和之
昔尋李愿向盤谷正見高崖巨壁爭開張是時新晴天

井溢誰把長劍倚太行衝風吹破落天外飛雨白日灑
洛陽東蹈燕川食曠野有饋木蕨芽滿筐馬頭溪深不
可厲借車載過水入箱平沙綠浪榜方口鴈鳴飛起穿
垂楊窮探極覽頗恣橫物外日月本不忙歸來辛苦欲
誰為坐令再往之許墮眇芒閉門長安三日雪推書撲
筆歌慨慷旁無壯士遣屬和遠憶盧老詩顛狂開絨忽
覩送歸作字向紙上皆軒昂又知李侯竟不顧方冬獨
入崔巍歲我今進退幾時決十年蠢蠢隨朝行家請官

供不報答何異雀鼠偷太倉行抽手版丞相不待彈劾
還耕桑

華山女

街東街西講佛經撞鐘吹螺闌宮庭廣張罪福資誘脅
聽衆狎恰排浮萍黃衣道士亦講說座下寥落如明星
華山女兒家奉道欲驅異教歸仙靈洗粧拭面着冠帔
白咽紅頰長眉青遂來昇座演真訣觀門不許人開扇
不知誰人暗相報忽然振動如雷霆掃除衆寺人跡絕

驂駟塞路連輜輶觀中人滿坐觀外後至無地無由聽
抽釵脫釧解環佩堆金疊玉光青熒天門貴人傳詔召
六宮願識師顏形玉皇頷首許歸去乘龍駕鶴來青冥
豪家少年豈知道來繞百市脚不停雲憲霧閣事恍惚
重重翠幔深金屏仙梯難攀俗緣重浪憑青鳥通丁寧

雪後寄崔二十六丞公

藍田十月雪塞關我興南望愁羣山攢天巍巍凍相映
君乃寄命於其間秩卑俸薄食口衆豈有酒食開容顏

殿前羣公賜食罷驕駟踏路驕且閑稱多量少鑒裁密
豈肯幽桂遺榛菅幾欲犯巖出薦口氣象肆兀未可攀
歸來殞涕揜關卧心之紛亂誰能刪詩翁憔悴劬荒棘
清玉刻佩聯玦環腦脂遮眼臥壯士大弔挂壁無由攀
乾坤施惠萬物遂獨於數子懷偏慳朝歛暮惜不可解
我心安得如石頑

記夢

夜夢神官與我言羅縷道妙角與根挈携陬維口瀾翻

百二十刻須臾間我聽其言未云足捨我先度橫山腹
我徒三人共追之一人前度安不危我亦平行躡翫

丘

切翫

生召

神完骨蹻脚不棹側身上視溪谷盲杖撞玉

切

版聲彭觥神官見我開顏笑前對一人壯非少石壇坡

陀可坐臥我手承顏肘拄座隆樓傑閣磊嵬高天風飄

飄吹我過壯非少者哦七言六字常語一字難我以指

撮白玉丹行且咀噍行詰盤口前截斷第二句縛虐顧

我顏不歡乃知仙人未賢聖護短憑愚邀我敬我能屈

曲自世間安能從女巢神山

七言律詩

奉和庫部盧四兄曹長元日朝迴

天仗宵嚴建羽旄春雲送色曉鷄號金爐香動螭頭暗
玉佩聲來雉尾高戎服上趨承北極儒冠列侍映東曹
太平時節難身遇郎署何須歎二毛

五言排律

遠遊聯句

別腸車輪轉一日一萬周郊離思春冰泮瀾浸不可收

愈馳光忽以迫飛轡誰能留愈取之詎灼灼此去信悠

悠楚客宿江上夜魂棲浪頭曉日生遠岸水芳綴孤舟

村飲泊好木野蔬拾新柔獨含悽悽別中結鬱鬱愁人

憶舊行樂鳥吟新得儔郊靈瑟時窅窅猿夜啾啾憤

濤氣尚盛恨竹淚空幽長懷絕無已多感良自尤卽路

涉獻歲歸期眇涼秋兩歡日牢落孤悲坐綢繆愈觀怪

忽蕩漾叩竒獨冥搜海鯨吞明月浪島沒大漚我有一

寸鈎欲釣千丈流，良知忽然遠壯志。鬱無抽郊颺魁暫
出沒蛟螭互蟠蟠，昌言拜舜禹舉颺凌斗牛懷精魄。賢
屈乘桴追聖邱，飄然天外步豈肯區中囚。愈楚些待誰
弔，賈辭緘恨投翳明。弗可曉祕魂安所求，氣毒放逐域
蓼雜芳菲疇當春，忽淒涼不枯亦颺颺。貉謠衆猥歎，巴
語相啞幽默誓去外俗嘉願還中州。江生行既樂躬輦
自相勸飲醇趣明代，味腥謝荒陬馳深鼓利楫趨險驚。
蜚輜繫石沉靳尚，開弓射鵑咬路暗執屏翳波驚戮陽

侯廣泛信縹緲高行恣浮游外患蕭蕭去中悅稍稍瘳
振衣造雲闕跪坐陳清猷德風變讒巧仁氣銷戈矛名
聲照四海淑問無時休歸哉孟夫子歸去無夷猶愈

晚秋鄆城夜會聯句

與李正封

從軍古云樂譚笑青油幕燈明夜觀棋月暗秋城柝

正封

羈客方寂歷驚鳥時落泊語闌壯氣衰酒醒寒砧作愈

遇主貴陳力夷凶匪兼弱百宰搗輿尸千戶購首惡

正封

平生恥論兵末暮不輕諾徒然感恩義誰復論勲爵愈

多士被沾汙小夷施毒蠱何當鑄劍戟相與歸臺閣

正封

室婦歎鳴鶴家人祝喜鵲終朝考著龜何日親烝灼

愈

聞使斷津梁潛軍索林薄紅塵羽書靖大水沙囊涸

正封

銘山子所工挿羽余何忤未足煩刀俎祇應輸管鑰

愈

雨矢逐天狼電矛驅海若靈誅固無縱力戰誰敢却

正封

峨峨雲梯翔赫赫火箭着連空隳雉堞照夜焚城郭

愈

軍門宣一令廟算建三略雷鼓揭千槍浮橋交萬筏

正封

蹂野馬雲騰映原旗火鑠疲氓墜將極殘虜狂可縛

愈

推鋒若貍兕超乘如猱攫逢掖服翻慙漫胡纓可愕封正

星殞聞雉雉師興隨唳鶴虎豹貪犬羊鷹鷂憎鳥雀愈

燒陂除積聚灌壘失依託憑軾諭昏迷執父征暴虐封正

倉空戰卒饑月黑探兵錯兇徒更蹈藉逆族相啗嚼愈

軸轡亘淮泗旆旌連夏鄂大野縱氐羗長河浴騶駱封正

東西競角逐遠近施矰矰人怨童聚謠天殃鬼行瘡愈

漢刑支郡黜周制閑田削侯社退無功鬼薪懲不恪封正

余雖司斧鑕情本尚邱壑且待獻俘囚終當返耕穫愈

葉街陳鈇鉞桃塞興錢鋪地理畫封疆天文掃寥廓

正封

天子憫瘡痍將軍禁鹵掠策勲封龍頤歸獸獲麟脚

愈

詰誅敬王怒給復哀人瘼澤髮解兜牟醜顏傾鑿落

正封

安存惟恐晚洗雪不論昨暮鳥已安巢春蠶看滿箔

愈

聲明動朝闕光寵耀京洛旁午降絲綸中堅擁鼓鐸

正封

密坐列珠翠高門塗粉腹跋朝賀書飛塞路歸鞍躍

愈

魏闕橫雲漢秦關束巖崿拜迎羅橐鞬問遺結囊橐

正封

江淮永清晏宇宙重開拓是日號昇平此年名作噩

愈

洪救方下究武翹亦旁魄南據定蠻陬北攬空朔漠

正封

儒生恆教化武士猛刺斫吾相兩優游他人雙落莫愈

印從負鼎佩門為登壇鑿再入更顯嚴九遷彌蹇諤

正封

賓筵盡孤趙導騎多衛霍國史擅芬芳宮娃分綽約愈

丹掖列鶴鷺洪鑪衣狐貉摛文揮月毫講劍淬霜鏑

正封

命衣備藻火賜藥兼拊搏兩廂鋪氍毹五鼎調勺藥愈

帶垂蒼玉佩轡蹙黃金絡誘接謂登龍趨馳狀傾藿

正封

青娥翳長袖紅頰吹鳴籥倘不忍辛勤何由恣歡謔愈

惟當早貴富豈得暫寂寞但擲佳笑金仍祈却老藥

封正

歿廟配罇學生堂合齋罇安行庇松篁高臥枕莞弱

愈

洗沐恣蘭芷割烹厭脾滕喜顏非忸怩達志無隕穫

封正

詼諧酒席展慷慨戎裝著斬馬祭旒纛魚羊禮芒屨

愈

山多離隱豹野有求伸蠖推選閭羣材薦延搜一鶚

封正

左右供諂諛親交獻諛喙名聲載揄揚權勢實薰灼

愈

道舊生感激當歌發酬酢羣孫輕綺紈下客豐醴酪

封正

窮天貢賂異市海賜酺醪作樂鼓還槌從禽弓始曠

愈

取歡移日飲求勝通宵博五白氣爭呼六竒心運度

封正

恩澤誠布濩竄頑已蕭勺告成上云亭考古垂矩矱

愈

前堂清夜吹東第良辰酌池蓮折秋房院竹翻夏籜

封正

五狩朝恒岱三畋宿楊柞農書乍討論馬法長懸格

愈

雪下收薪息陽生過京索爾牛時寢訛我僕或歌号

封正

帝載彌天地臣辭劣螢嚼為詩安能詳庶用存糟粕

愈

五言絕句

青青水中蒲三首

青青水中蒲，下有一雙魚。君今上隴去，我在與誰居。
青青水中蒲，長在水中居。寄語浮萍草，相隨我不如。
青青水中蒲，葉短不出水。婦人不下堂，行子在萬里。

高古

七言絕句

榴花

五月榴花照眼明，枝間時見子初成。
可憐此地無車馬，顛倒青苔落絳英。

唐詩鏡卷三十九

欽定四庫全書

唐詩鏡卷四十

明 陸時雍 撰

中唐第十二

孟郊

字東野湖州人少隱嵩山性耿介五十登進士第為溧陽尉日賦詩曹務多廢令白府以尉代之分

其半俸鄭餘慶奏為叅謀卒諡貞曜先生為詩有理聲愈甚稱之集十卷行世

孟郊語好初造然多生強不成章趣人謂郊寒島瘦余謂郊拙島苦

五言古詩

征婦怨

漁陽千里道近如中門限中門踰有時漁陽長在眼生
在絲羅下不識漁陽道良人自戍來夜夜夢中到

一起四語轉合失趣又云生在絲羅下不識漁陽道與上語益病

夜感自遣

一作失志夜坐思歸楚江

夜學曉未休苦吟神鬼愁如何不自閑心與身為讐死
辱片時痛生辱長年羞清桂無直枝楚江思舊遊

四語痛衷鮑昭湮沒雖

生辱長年羞此無志人語死悲貧賤即生劉頗同此恨

長安旅情

說盡青雲路有足皆可至我馬亦四蹄出門似無地玉
京十二樓我我倚青翠下有千朱門何門薦孤士

秋懷

秋月顏色冰聲去老客志氣單冷露滴夢破峭風梳骨寒
席上印病文腸中轉愁盤疑懷無所憑虛聽多無端梧
桐枯嶢聲響如哀彈

遊終南山

南山塞天地日月石上生高峯夜留景

太白峯西黃深昏後見餘日

谷晝未明山中入自正路險心亦平長風驅松柏聲拂
萬壑清到此悔讀書朝朝近浮名

遊終南龍池寺

飛鳥不到處僧房終南巔龍在水長碧雨開山更鮮步
出白日上坐依清溪邊地寒松桂短石險道路偏晚磬
送歸客數聲落遙天

與王二十一員外涯遊枋口柳溪

萬株古柳根挈此磷磷溪野榜多屈曲仙澗無端倪春
桃散紅煙寒竹含晚淒曉聽忽以異芳樹安能齊共疑
落鏡中坐泛紅景低水意酒易醒浪情事非迷小儒峭
章句大賈嘉提携潛竇韻靈瑟翠崖鳴玉珪主人稷禹
翁德茂芝木畦鑿山幽隱端氣象皆昇躋曾是清樂抱
逮茲幾省溪宴位席蘭草濫觴驚鳧鷖靈味薦魴鱖金
花屑橙齏江調擺襄俗洛風遠塵泥徒言奏狂捐詎敢

忘筌蹄

集中得此
似覺輕脫

旅次洛東城水亭

水竹色相洗碧花動軒楹自然逍遙風蕩滌浮競情霜
落葉聲噪景寒人語清我來招隱亭衣上塵暫輕

五六
語峭

北郭貧居

進乏廣莫力退為蒙籠居三年失意歸四向相識疎地
僻草木壯荒條扶我廬夜貧燈燭絕明月照我書欲識

貞靜操秋蟬飲清虛

夜貧二語
來得不韻

題陸鴻漸上饒新開山舍

驚彼武陵狀移歸此巖邊
開亭擬貯雲鑿石先得泉
嘯竹引清吹吟花成新篇
乃知高潔情擺落區中緣

三四佳趣兼
有硜硜聲

分水嶺別夜示從弟寂

南中少平地山水重疊生
別泉萬餘曲迷舟獨難行
四

際亂峯合一眺千慮并潺湲冬夏冷光彩晝夜明賞心
難久勝離腸忽自驚古木搖霽色高風動秋聲飲爾一
樽酒慰我百憂輕嘉期何處定此晨堪寄情

贈崔純亮

食齋腸亦苦強歌聲無歡出門即有礙誰謂天地寬有
礙非遐方長安大道傍小人智慮險平地生太行鏡破
不敢光蘭死不改香始知君子心交久道益彰君心與
我懷離別俱迴遑譬如浸蘖泉流苦已日長忍泣目易

衰忍憂形易傷項藉非不壯賈生非不良當其失意時
涕泗各沾裳古人勸加餐此餐難自強一飯九祝噎一
嗟十斷腸况是兒女怨怨氣凌彼蒼彼蒼昔有知白日
下清霜今朝始驚歎碧落空茫茫

吳安西館贈從弟楚客

蒙籠楊柳館中有南風生風生今為誰湘客多遠情孤
枕楚水夢獨帆楚江程覺來殘恨深尚與歸客并玉匣
五絃在請君時一鳴

酬李侍御書記秋夕雨中病假見寄

秋風遶衰柳，遠客聞雨聲。
重茲阻良夕，孤坐唯積誠。
果往移疾詠，中含嘉慮明。
洗滌煩濁盡，視聽昭曠生。
未覺衾枕倦，久為章奏嬰。
達人不可寶，藥所保在閑情。

山中送從叔簡赴舉

石根百尺杉，山眼一片泉。
倚之道氣高，飲之詩思鮮。
兼此逍遙場，忽奏別離絃。
却笑薜蘿子，不鳴同躍年。

起四語
孤亮

與韓愈李翔張籍話別

朱絃奏離別華燈少光輝物色豈知異人心故將違客
情殊未已歲華忽然微秋桐故葉下寒露新鴈飛遠遊
起重恨送人念先歸夜集類飢鳥晨光失相依馬跡遶
川水鴈書還闈闌常恐親朋阻獨行知慮非

遊子吟

慈母手中線遊子身上衣臨行密密縫意恐遲遲歸誰
言寸草心報得三春暉

不乏古意

附間砧 杜鵑聲不哀 斷猿啼不切 月下誰家砧 一聲腸一絕 杵聲不為客 客聞髮自白 杵聲不為衣 欲

令遊子歸

附秋懷內 詈言不見血 殺人何紛紛 聲如窮家犬 吠窳何閭閻 閭詈痛幽鬼 哭詈侵黃金 貧言詞豈用多 憔悴在一聞 古詈舌不死 至今書云云 今人詠古書 善惡宜自分 秦火不焚舌 秦火空焚文 所以詈更生 至今橫網緼 落意不至此

七言古詩

出門行

海風蕭蕭天雨霜窮愁獨坐夜何長驅車舊憶太行險
始知遊子悲故鄉美人相思隔天闕長望雲端不可越
手持琅玕欲有贈愛而不見心斷絕南山峩峩白石爛
碧海之波浩漫漫參辰出沒不相待我欲橫天無羽翰

附嬋娟篇
花嬋娟
泛春泉
竹嬋娟
籠曉煙
妓嬋娟
不長妍
月嬋娟
真可憐
夜半姮娥朝
太乙人間本自
無靈匹
漢宮承寵不多
時飛燕婕妤相妬嫉

五言絕句

古怨

試妾與君淚兩處滴池水看取芙蓉花今年為誰死

閑愁

妾恨比斑竹下盤煩冤根有筍未出土中已含淚痕

古別離

欲別牽郎衣郎今到何處不恨歸來遲莫向臨邛去

再下第

一夕九起嗟夢短不到家兩度長安陌空將淚見花

七言絕句

登科後

昔日齷齪不足誇
今朝放蕩思無涯
春風得意馬蹄疾
一日看盡長安花

末二句似古詩語
不類絕句常調

楊巨源

字景山蒲州人貞元進士文宗
太和中為河中少尹詩一卷

七言古詩

烏啼曲贈張評事

可憐楊葉復楊花
雪淨烟深碧玉家
烏棲不定枝頭弱

城頭夜半聲啞啞浮萍流蕩門前水任眉芙蓉莫作花

末語
風趣

五言排律

贈隣家老將

白首羽林郎丁年戍朔方陰天瞻磧路秋日渡遼陽大
漠寒山黑孤城夜月黃十年依蓐食萬里帶金瘡拂雪
陳師祭衝風立教場箭飛瓊羽合旌動火雲張虎翼分
營勢魚鱗擁陣行誓心清塞色鬪血雜沙光戰地晴輝

薄軍門曉氣長冠深爭暗襲關迴勒春防身賤竟何訢
天高徒自傷功成封寵將力盡到貧鄉雀老方悲海鷹
衰却念霜空餘孤劍在開匣一霜裳

語有
氣幹

七言絕句

和練秀才楊柳

水邊楊柳綠烟絲立馬煩君折一枝惟有春風最相惜
慙慙更向手中吹

呂溫字和叔又字化光河中人從陸贄治春秋登進士第藻翰精富流輩惟尚性好利竇羣薦知雜事李

吉甫持之溫奏吉甫陰事憲宗怒貶均州刺史再貶道州刺史有集十卷

七言古詩

道州春遊歐陽家林亭

道州城北歐陽家去郭一里占烟霞主人雖朴甚有思
解留滿地紅桃花桃花成泥不須掃明朝更訪桃源老
政成興足告即歸門前便是家山道

語氣
落落

五言絕句

鞏路感懷

馬嘶白日暮，劍鳴秋氣來。
我心浩無際，河上空徘徊。

七言絕句

讀小弟詩有感，因以口號示之

憶君未冠賞年華，二十年間在咄嗟。
今來羨汝看花歲，似汝追思昨日花。

道州送戴簡處士往賀州謁楊侍御

羸馬孤童鳥道微三千客散獨南歸
山公念舊偏知我今日因君淚滿衣

劉言史

趙州人與孟郊友善詔授棗強令不就後為司功掾

七言絕句

長門怨

獨坐爐邊結夜愁暫時思去亦難收
手持金筋垂紅淚亂撥寒灰不舉頭

雖乏高華
當亦有致



唐詩鏡卷四十